

Supervizor se u Brčkom sastao sa zapovjednikom EUFOR-a



Supervizor za Brčko Distrikt dr Raffi Gregorian sastao se danas sa general-bojnikom Bernhardom Bairom, zapovjednikom snaga Europske unije (EUFOR) u Bosni i Hercegovini koji je došao u svoju prvu zvaničnu posjetu Distriktu od kada je preuzeo komandu nad EUFOR-om u prosincu 2009. godine. «Posjeta generala Baira Brčkom na samom početku njegova mandata kao zapovjednika EUFOR-a je jasan znak da on uvažava strategijsku važnost Brčkog», rekao je supervizor Gregorian. «Svi mu se zahvaljujemo na posjeti i poruci stabilnosti koja je ovom posjetom upućena u vrijeme političkih tenzija u BiH», rekao je Gregorian.

Supervizor Gregorian je ukratko izvjestio generala Baira i njegovo osoblje o uspostavi i razvoju Brčko Distrikta, napretku koji je ostvaren u ispunjavanju Konačne arbitražne odluke i preostalim izazovima. Najveći izazov je to što Vlada Republike Srpske koju predvodi SNSD trenutno odbija ispoštovati pravne obveze koje ima sukladno Konačnoj odluci, uključujući i one u svezi sa dugovanjima, entitetskim državljanstvom i električnom energijom. Takvo odbijanje predstavlja «ozbiljno nepoštivanje» Konačne odluke i osnovni je razlog koji onemogućava okončanje supervizije u Brčkom.

«General Bair odlično poznaje situaciju u Brčkom i važnu ulogu koju EUFOR mora odigrati u pogledu pružanja osjećaja sigurnosti stanovnicima Brčkog i građanima BiH», rekao je supervizor. «Njegova posjeta u ovom trenutku je od posebnog

značaja, imajući u vidu da na teritoriji Brčko Distrikta ne može biti održan referendum bez prethodne suglasnosti supervizora u pisanoj formi», zaključio je Gregorian.